

Lalan

Benoho adé cerito tun-tun tui. Cerito ne aweé yo. Adé nak do sadeé tingā ba dikup perjaka. Gén ne Bujang Kurung. Adé de bilei si aleu mengéwéa nak bioa Musei, coa hoah jak kuni sadeé ne. Neṁin ne belas mageh silei. Si aleu wakteu menék matei bilei. Si ceñok-ceñok bepanea kékéa. Coa beberapa han si sapeé nak penan ne lak mengéwéa. Si mulai mengéwéa. Coa katék kan de lak eṁuk ne kéwéa ne. Bilei bi lekat coa katék aséa ne. Udém ho si lak bélék. Wakteu si bélék tetengoa sewaho tun ribut. Si miṁang ne. Si héran kemeléah adé tun alep-alep nien gidong meñei.

Ules ne tobo ho semulen-semulen. Adé dikup de alep suhang. Si de paling titik sekilei. Diem-diem Bujang Kurung memahak ne, coa tobo ho kemeléah ne didik pun. Bujang Kurung lasung mak bajeu de paling titik sekilei. Wakteu tobo ho udo meñei, lak makeé bajeu, ano rupo ne pakeé de paling titik ano udém laput. Asoah bahasoah ne udém makeé bajeu kehete lak bélék mai léngét cuman de paling titik ano coa nam terbang igei. Bajeu ne bi laput. Si menangis han nien. Asoah bahasoah ne menangis pulo kemeléah asoah ne coa nam bélék igei. Kesudo ne kehete ne aleu. Tingā ba de paling titik suhang.



Bujang Kurung kemeléah aweé ho. Se héran si coa semako rupo ne adé ba anak diwo si munyin bajeu de nemak ne ano, si terus eṁin melilei. Udém ho Bujang Kurung majak si mai sadeé ne. Lak temanyé Bujang Kurung api gén ne. Gén ne adé ba Lalan.

Udém sapeé sadeé, Lalan neṁin Bujang Kurung mai umah ne. Tingā ba Lalan nak di selamo-lamo ne. Bujang Kurung lasung mahak ne Lalan. Tun bedui yo saling sayang-menyayang serto saling cito. Coa han udo ho tun sadeé lasung temikah ne tun dui yo ano.

Batas yo ba cerito ne.

Kacéa si Pengiké

Belo ho adé kacéa dikup. Cerito ne aweé yo. Wakteu ho zaman Nebei Sulaiman Benatang pacak kehete miling.

Bilei panes, kacéa bepanea-panea mai ipo baé masuk hiño de sunyei nien. Kacéa bepanea-panea mai umah kuat-kuat ne, cuma kuat-kuat ne aleu kehete.

“Ah, lebéah padék uku tiduh baé,” kacéa bekekiro. Si mesoa pun kiesa penan belinep. Si mulai tiduh. Seati lak tiduh, tetengoa si kemerisik. Wakteu si kemeléah mai kebelék kedong, ine yo, himea lak emuk ne. Kacéa lak melilei, coa nam igei. Jijei si cék-cék sedih.

Himea ho betanyé, “Bak ne ko sedih, Kacéa? Dang susah ku lak eṃuk ko”.

“Uku coa sedih ko lak eṃuk ku,” padah kacéa. Tapi de uku bingung, api tukang jemago gong ninik uku yo?” padah kacéa samo temun̄juk sahang medeu nak das pun kiea ho. Udém ho kacéa menangis lék-lék.

“Buléah uku temaboah ne, Céa?” tanyé himea ho. “Coa buléah!” padah kacéa samo menangis

“Bak ne?” padah Himea.

“Kereno ateé ku sedih nien kaleu uku temengoa ne.”

“Kunyeu uku temaboah ne, Céa!” kinai himea. “Bé uku coa gén eṃuk ko.”

“Tapi tengén ko temaboah ne, até ku bingung igei,” padah kacéa. “Tapi kaleu ko lak temaboah ne kulo, kunyeu ba uku melilei hoah-hoah kulo,” padah kacéa. “Kaleu uku madah `Buléh!’ ko mulai temaboah ne. Uku coa nam temengoa igei,” padah kacéa.

“Aleu ba!” padah himea.


Udém ho melilei kacéa hoah-hoah. Udém hoah si mekik ”UUDDEÉMM!” mulai ba himea temaboah sahang medeu ho. Ine padah ite? Ketui medeu kelueh nenget himea.

Himea tepetik-pekik gis nenget medeu. Mai ipo-mai ipo si meliliei manyo medeu ho han-han sapeé mateé himea ho.



Bélék ite mai kacéa dete. Si melilei gacang-gacang. Udém ho si behédan pahak nopoé lei gidong tiduh. Ine kejije ne? Si coa teu behuang nak belakang ne lak eṁuk kacéa. Tapi kacéa miling, "Bé kilah!" Kaleu behuang lak eṁuk ne, si lak makeé tilei lilit Nebei Sulaiman de begulung ho kereno si de jemago ne de neloah Nebei Sulaiman. Behuang mak tilei lilit gidong begulung. Si makeé ne. Ine padah ite? Nopoé jago aweé ipo si mékét behuang sapeé behuang mateé.

Udém ho kacéa melilei hoah-hoah.



“Tapi kalau kamu hendak memukulnya juga, tunggu dulu, aku pergi jauh-jauh,”kata kancil.

Ketem mageh Behuk

Belo ho nak negerei Nebei Sulaiman adé dikup behuk mageh tipei. Si samo-samo temanem anak pun pisang. Tipei yo, si temanem anak pun pisang, tapi de behuk si temanem pun pisang de bi agak lei dan ne bi mai bah. Pisang de tenanem behuk ho coa idup. Pisang de tenanam tipei idup alep.

Nadah tipei, “Bi lei pisang ku.”



“Bilei pulo pisang ku,” padah behuk.

Coa han igei bi banak pisang tipei. Padahal tipei mageh behuk, “Bi banak pisang ku.”

“Bi banak kulo pisang ku,” padahal behuk. Coa han igei bi masak pisang tipei. Tapi tipei coa nam bekenék. Neloah tipei, behuk bekenék ne. Sapeé behuk nak das ne, si terus eñuk ne. De siket abis, dui siket abis, udém ho, si lak mabis kehete ne.

Padah tipei, “Kehus ké gén dik ku debuah, behuk!”

“Debuah manis!” padahal behuk.

“Kehus ké mageh ku kak ne baé,” padahal tipei.

“Kak ne mis,” padahal behuk. Udém ho abis pisang deteñun neñuk behuk.

“Cék ipo caro males behuk yo?” nikir tipei. Si pacak bekenék, si pacak melupat, uku bepanea baé ceñok-ceñok. Uku minai tulung mageh ketem bae.” Si berakat mai penan ketem. Si cemerito kelak ne.

“Jijei,” padah ketem. Udém ho ketem aleu mesoa behuk, coa betemeu. Ketem diem nak bah buteu mot behuk. Coa han udém ho, behuk sapeé, temot nak das buteu penan ketem sebunyin. Temot behuk nak das buteu, mulai ketem miling.



“Ketem mengapit!” padah ketem.

“Hoy! Api nak di ho?” padah behuk.

“Ketem mengapit!” padah ketem. Ketem mengapit-ngapit botoah behuk ho.

“Hoy, Api ho?” padah behuk.

“HAAAAAAAAI” jawab ketem.

“Oy” padah behuk. “Mak ne ko de temanyé, bak ne ko de jemawab ne?” Desako behuk, botoah ne de jemawab ne. Udém ho si mak kiesa terus mecut botoah ne dewek sapeé behuk mateé.

Ho kaleu tun ajoh-ajoh. Sako ne de jemawab kécék ne botoah ne. Padahal ketem.

Putri

Belo ho adé cerito tun tui-tui. Adé tun de begén Majei penan ne nak sadeé Tanjung. Anak ne adé semilan. De titik sekilei gén ne Putri, Putri yo alep sekilei, gén kalep ne. Tun sayang kehete mageh si. Tapi sanak-sanak ne coa adé de setuju kemeléah Putri ho. Sanak ne madah terus. Si kemiték-kemiték ne. Terus sanak ne marah.

Udém ho adé de laput nak umah ne. Tun ribut mesoa ne, coa betemeu. Tun temodoah Putri de mak ne.

Pedak cerito ne, Putri lak naṁung mai lem behukoa. Putri coa teu si lak naṁung bapak ne. Coa han udém ho, si najak bapak ne mai behukoa. Kabuk-kabuk udém aleu mes meé nak lem bukus, sayur nak lem tabung.

Sapeé nak lem behukoa, nak ping̃ir dalen gajah, neneh bapak ne poñok serodong. Wakteu poñok ho udém, bapak ne madah, “Eṁot nak poñok, uku aleu mak kiesa nak pahak yo ba.” Udém ho bapak ne aleu.

Putri ho, si belem̃ot. Bi han si belem̃ot. Bapak ne coa sapeé igei. Coa han igei bilei lak kelemen. Poñok ne nak dalen gajah dete, penan pelitas benatang bélék kuni mesoa peṁuk. Peé-peé melitas gajah.

Si temahak Putri, “Hoy! Putri ine gén kerjo ko nak di? Bilei lak kelemen!”

“Uku naṁung bapak ku,” padah Putri. Lasung udém ho, deu benatang liwet.

Terahir liwet nopoé lei.

Si temanyé Putri, “Ine de neṁot ko nak yo? Bilei bi lak kelemen!” Jenawab

Putri, “Uku coa adé penan bélék. Uku coa teu dalen. Uku naṁung bapak ku,” padah

Putri.



“Kaleu cék ho, maro ba mileu uku bélék!” padah nopoé lei. Terus nopoé lei ho maket Putri nak das kedong ne. Udém ho neṁin ne Putri mai sadeé ne, sembehang bioa, melitas hiṁo de helem. Udém ho, sapeé tobo ho nak sadeé nopoé lei. Si senaṁut tun sadeé ho. Wakteu nopoé lei sapeé nak sadeé ne, mako si behubah jijej perjaka alep. Coa han udém ho si tenikah tun sadeé mageh Putri.

Cuma sapeé yo ba cerito ne.





**Waktu ular besar sampai di dusunnya, maka dia berubah jadi
bujang ganténg.**

Kacéa mageh Raksasa

Belo ho adé cerito kacéa de lak mesoa kan nak bioa coa hoah jakni penan ne tin̄ga. Wakteu bilei ne lak berakat, si berakat hakwéng-hakwéng. Si bepanea gancang. Nak dalen si betemeu mageh mangé hīmo.

Tenanyé mangé hīmo, “Hoy, 'Cea! Lak mai ipo ko?”

“Lak mesoa kan,” padah kacéa.

“Uku mileu, buléah coa?” padah mangé hīmo.

“Maro ba,” padah kacéa. Udém ho, terus si bepanea mageh mangé hīmo. Coa han udém ho betemeu mageh himea.

“Lak mai ipo udi bedui?” padah himea. ”Mesoa kan,” padah kacéa.

“Uku mileu,” padah himea.

“Buléah!” padah kacéa. Udém ho ceñok-ceñok tobo ho bepanea. Udém ho coa han betemeu igei mageh gajah.

“Lak mai ipo udi kehete ne yo?” padah gajah.

”Kémé lak mesoa kan,” padah kacéa.

“Uku mileu, buléah coa?” padah gajah.

“Buléah,” padah kacéa. Coa han tobo ho bepanea melitas tebing, melitas hiṃo. Sapeé tobo ho nak penan de nadah kacéa, mulai ba si meneh utuk kemehing bioa. Gajah tukang makut pitak ne. Mangé hiṃo terus mikoa ne. Coa han udém ho, kehing bioa ho. Mulai mesoa kan. Uléah ne naket mai dahet nepék nak bah pun kiea lei. Neloah himea temunġeu ne. De leyen terus mesoa kan.

Bélék cerito ite mageh himea, tukang eṁot kan. Wakteu si baik-baik eṁot kan, sapeé raksasa. ”Hoy himea, ine kerjo nu?”

“Uku temunḡeu kan,” padah himea.

“Uku lak eṁuk uléah ko kehete,” padah raksasa

“Pak mi!” padah himea.

“Ko nonoh ku bé!” padah raksasa ho. Kemeteh himea temengoa ne. Si melilei mai penan kacéa. Si becerito mageh kacéa raksasa eṁuk kan ite. “Kurang ajeh! selon panḡang, paing tajem ho, tapi coa adé guno ne,” padah kacéa. Kacéa meloah gajah temunḡeu kan, tapi gajah coa kulo binei. Melilei si kemeléah raksasa ho. Udém ho, si neloah mangé hiṁo, coa kulo binei.

“Kurang ajeh! Kehete ne lei-lei coa adé de melawen. Bé uku temun̄geu ne,”
padah kacéa. Aleu kacéa temun̄geu kan. Raksasa ati sapeé. Kacéa mak bebes. Si terus
semañung ne pan̄jang-pan̄jang nien. Wakteu si meneh ne aweé yo, sapeé raksasa lak
eñuk kan. Cuma héran si kemeléah kacéa meneh aweé ho. Si betanyé, “Oy! Kacéa! Ine
kerjo ko?”

“Uku meneh tilei kereno dunyo lak kiamat. Pun kiesa ho baé de coa majuh ne,”
padah kacéa.

“Uku menupang, 'Céa!” padah raksasa ho.

”Dang!” padah kacéa.

“Laa, Céa! Ite sanak,” padah raksasa ho samo purik. “Ko neñuk ku bé!” padah
raksasa ho.

“Eṃuk ba,” padah kacéa. ”Bé ine uyo samo-samo mateé,” padah kacéa. Raksasa sedih serto kemeteh kag.

Penyudém ne: “Keso ba tilei bebes deu-deu,” padah kacéa. Raksasa aleu mesoa tilei bebes deu-deu.

Bi deu bebes ne, padah kacéa, ”Nelilit ké mai awak ko samo nékét nak kiea lei ho.” Mulai raksasa mékét ne. Nékét ne kuet-kuet deu-deu ne.

“Cenubo megerutak,” padah kacéa. Tapi raksasa ho coa nam lepas igei.

”Léngét bekelem, bilei lak ujen!” padah kacéa. ”Dunyo lak kiamat!”

Udém ho kacéa mékét kehagen raksasa sapeé coa nam igei temarik nafas, sapeé mateé.

”Yo upah tun de galak emuk kan aséa keme,” padah kacéa. Raksasa ho mateé, kacéa majak kuat-kuat ne kemeléah. Kuat-kuat ne terus pinsan kehete kemeléah kacéa.



Tiñung

Belo ho nak sadeé de hoah jakni pasar adé dikup semulen de alep. Gén ne Putri. Si anak diwo de tuhun mai dunyo kerno kelewargo ne coa senang kemeléah si.

Hakweng-hakweng si aleu mai bioa kulam de pahak umah ne. Si terus puk buk ne. Jijei bayangan ne ketén nak lem bioa. Penan meñei ho nak bah pun kiea. Nak das ne adé sétan gidong emot ne. Sétan ho gén ne Tiñung. Si gidong temot nak das dan de lei. Keneléah ne bayang-bayang Putri nak lem bioa ho. Sako ne bayang ho alep nien. Udém ho keneléah ne bayangan Putri ho ade. Gengik nien si kemeléah Putri ho.

Adé kulo nak sadeé leyen tin̄ga dikup perjaka berlagak, gén ne Bujang Kurung. Si aleu mai penan-penan samo em̄in piket poyoah. Bepanea ceñok-ceñok masuk hiṃo kelueh hiṃo, masuk sadeé kelueh sadeé, sapeé ba si nak sadeé Putri de alep ho. Si kemeléah Putri ho alep nien. Si meloah iñok ngen bapak ne mehasen Putri ho. Lak kulo Putri ho. Udém mehasen kedeu taño ne, serto dengen de leyen-leyen ne bi udém, bilei ne udém tentep. Tin̄ga em̄ot ne ho ba igei.



Rupo ne tetengoa uléah ateu beé nak das kiesa lei nak penan meñei ho. Ateu beé ho gén gik temengoa ne. Coa han udém ho Putri lak tenunak tun mageh Bujang Kurung. Hakweng-hakweng ho tun lak sedekah, Putri aleu mai bioa lak meñei. Ateu beé kemeléah Putri lak meñei, si terus temulak Putri sapeé Putri hus monot. Ateu ho behubah jijej beé samo ules ne mageh Putri. Ules-ules ne Putri coa adé tun deteu de bélék jakni meñei ho iso Putri. De tenikah tun ateu beé ho mageh Bujang Kurung.

Bélék cerito ite mageh Putri ho dete. Si monot terus sapeé do sadeé, tenakap tun. Naket tun jiji anak ne.

Bélék igei cerito ite mageh ateu beé de jiji mageh Bujang Kurung dete. Gén ne Tiñung. Peketei-peketei ne tun coa teu bak ne si adé kelebihan. Coa han udém napak Bujang Kurung hus sakit. Punḡung ne melékét mageh tikeh, awak ne udém jahei. Udém tinḡa telan melékét babak. Eḡuk meé coa lak, méném bioa kulo coa lak. Tun bi ribut kehete mikir ne. Macem-macem ubet udém neleé, cuma Bujang Kurung coa kene kahen.

Udém ho adé tun jakni sadeé leyen dete temeléék timōa. Tun ne beé. Neṁin ne meé mageh bioa méném. Neloah ne Bujang Kurung eṁuk ne. Anéh ne Bujang Kurung gacang sihat, eṁuk meé galak. Cuma kaleu beé ho bélék mai sadeé, Bujang Kurung miño sakit igei. Kaleu beé ho sapeé igei, sihat igei Bujang Kurung. Bujang Kurung aweé ho terus terusan ne.

Pedak cerito han-han tenanyé tun, "Api nona de sebeneh ne?" Si coa lak meleé gén ne atau cerito ne. Udém neloah baru beé ho becerito. Udém temengoa cerito ho, baru tun teu beé ho ade ba Putri de monot belo ho.

Tiñung temengoa kulo cerito ho. Terus tun temakap ne, terus tun meheñem sapeé si mateé. Putri dete lajeu tingā nak di ba. Buajng Kurung ho sihat igei.

Sapeé yo ba cerito ne.





Sétan perempuan tadi melihat Putri mau mandi, dia langsung mendorong Putri ke sungai sehingga Putri jatuh hanyut.

Behuk mageh Tipei

Belo ho adé behuk sepahak umah ne mageh tipei. Behuk hakweng-hakweng udém bepanea mai umah tipei. Wakteu ho bilei ujen selonjo. Padahal behuk mageh tipei, “Ine gén ulah ite, San? Bilei coa baik, ujen baé.”

“Bediang baé ite,” padahal tipei.

“Aro ba,” padahal behuk. Udém ho tipei mak kiesa midup opoé lei. Bediang ba behuk mageh tipei emot ujen behedan. Coa han udém ho ujen mulai behedan. Betanyé tipei, “Mai ipo ite aleu bilei yo, San?”

“Tah ba,” padah behuk samo bepikir.

”O, adé kerjo ite,” padah behuk samo tetawei. “Ite maling pedes Pak Haji baé. Si coa aleu mai kebun bilei ujen yo.”

“Aro ba ite!” padah tipei. Coa han udém ho, aleu ba behuk mageh tipei lak maling pedes. Bepanea si bedui ateé-ateé wakteu pahak kebun pedes Pak Haji. Sesapeé si bedui nak di, behuk mulai eṁuk pedes ne. Tipei eṁuk kulo. Wakteu behuk eṁuk ne teraso gis behuk.

“Waaaah! Pelgéah pedes Pak Haji yo!” Lék nien saheé ne.

“Dang mekik lék!” padah tipei.

Cuma behuk taṁah lék. “Iñok! Pelgéah nien pedes Pak Haji,” padah behuk.

“Diem!” nadah tipei. Cuma behuk taṁah lék sapeé Pak Haji teu. Si lasung manjō behuk mageh tipei. Behuk gacang melilei hingō dapet tipei de tenakap Pak Haji. Si lasung meluk tipei mai kebun tebok salak. Tesakut tipei nak kebun tebok salak ho. Beguyang kaleu teninyup angin.

Udém meluk tipei mai kebun tebok salak dete, Pak Haji bélék. Begoyo-goyo behuk memahak tipei de tegatung nak tebok salak ho. Begoyo-goyo si mecat tipei jakni penan si tesakut. Udém mecat tipei, tegelicih kulo behuk. Behuk hus tesakut kulo nak kebun tebok salak. Tipei coa nam temulung sapeé behuk mateé.

